

խորքը, որտեղ ուխտավորներն առանձին ջերմեռանդությամբ վառում էին լուսեր պատերի բոլոր քարերի վրա, ինչքան որ մարդու ձեռքն էր հասնում: Այսօր էլ պահպանվում են կայքած մոմերի և նրանց բոցերի հետքեր: Հատակին թափթփված են առաստաղից և պատերից պոկ ընկած քարաբեկորներ: Լճակների ջուրը երբեմն ամբողջ ամառվա ընթացքում ծածկված է մնում սառույցի շերտով: Այդտեղի ջուրը համարվում էր սուրբ և հրաշագործ: Երաշտի կամ մորեխի ժամանակ՝ ժողովուրդը տանում էր արտերում սրսկելու համար: Տանողը պիտի մոտենար անխոս և նույնպես էլ անխոս, ետ-ետ դառնալով, դուրս գար: Վերցնում էին նաև քարայրի խորքում պատերի տակից հողը՝ խլնթունը աղի հետ անասունին կամ հիվանդ երեխաներին տալու համար: Եթե լճակների մեջ ջուրը ցամաքած էր լինում՝ գուշակում էին, որ տարին վատ է լինելու⁶²:

Ուխտավորները սարքվում էին քերծի գագաթից դեպի արևելք տարածվող համեմատաբար հարթ հրապարակի վրա, որը կոչվում է Ղուրբան ֆառան՝ Մատաղի հրապարակ, այստեղ էր մորթվում մատաղը Եկեղեցի իջնելուց հետո: Հրապարակից Եկեղեցի իջնելը շատ դժվարին է: Մի նեղ կածան տանում է ներքև, քարից քար, մինչև որ ուխտավորը հասնում է մի տեղ, որտեղ գրեթե ժայռի երեսին փարվելով ստիպված է լինում քայլերը զգուշությամբ դնել ժայռակողի մեկ դուրս ցցվածքից մյուսին: Նրա աչքերի առաջ ներքևում բացվում է ուղղաձիգ անդունդը: Մի անզգույշ քայլ կարող է անփորձին վտանգի ենթարկել: Վայր ընկնողի մեծ կտորը ականջը կմնար: Այդ կապով կարող էին անցնել միայն անմեղները: Բնակիչները պատմում են, որ վայր գլորվելու դեպքեր եղել են: Ուխտավորներն այդ կածանով իջնում էին ոտաբոբիկ, ոչ թե իրենց բարեպաշտության ապացույցներ տալու համար, այլև զգուշությունից դրդված:

Քերծի ձախակողմյան գագաթը կոչվում է Ճգնավօր: Այդտեղ ուխտավորները բարձրանում էին ժայռի ետևի կողմից, որտեղ լանջը թեև բավական զառիթափ է, բայց վերելքը հնարավոր է: Այդտեղ էլ բարձրանում էին ոտաբոբիկ, բազմաթիվ ուխտավորների ոտքերի տակ դարերի ընթացքում ողորկված կողով: Գագաթին փաթաթված է մի քարակույտ, որի տակ իբր թե թաղված էր մի անհայտ ճգնավոր⁶³:

Խուստուփն այցելում էին թե՛ Կապանի և թե՛ Մեղրու շրջանի ոչ միայն մերձավոր, այլև շատ հեռավոր գյուղերի բնակիչները: Երկու հազարի չափ գառ ու ոչխար էր մորթվում Ղուրբան ֆառանի վրա: Լեռն ամբողջովին կորչում էր ծխի մեջ, գոռնա-ղավալը դղրդացնում էր շրջակայքը, մրգավաճառներն ու մանրավաճառները վխտում էին: Այստեղ էլ քահանաները հավաքում էին իրենց բաժին մատաղի բուրդն ու մորթին:

Լեռների գագաթների պաշտամունքի հետ զուգորդված է նաև լեռնանցքների ոգիների պաշտամունքը: Իմ մի աշխատության մեջ⁶⁴ նկարագրել եմ Հայկական լեռնաշխարհում լեռնանցքների մոտ կառուցված սրբավայրերը, որտեղ, ինչպես ալպյան Ս. Բերնարի և Ս. Գոտարդի լեռնանցքների մոտ կառուցված սրբավայրերում՝ ուղևորներն աղոթելով և մամեր վառելով, աշխա-

⁶² Քարայրի մեջ գիշերը ապաստան էին գտնում եղնիկն ու լեռնայծը: Նրանց հստած տեղերում կուտակված է կրտս: Թռչունները դուրս են թռչում պատերի ճեղքերի ու ծալքերի միջից, իրենց թևերի աղմուկով լցնելով քարայրը:

⁶³ Այդտեղից ոչ հեռու շինված է երկրաշափի կուրգանը իր համարի մակագրությամբ:

⁶⁴ Святые у перевалов, «Советская этнография», 1936 г., № 4—5 էջ 200—201.